

**PROXECTO DE CONVENIO ENTRE A AXENCIA GALEGA DE INNOVACIÓN (GAIN), O INSTITUTO GALEGO DE PROMOCIÓN ECONÓMICA (IGAPE) E A SOCIEDADE PARQUE TECNOLÓXICO DE GALICIA, S.A., PARA A REALIZACIÓN DO PROGRAMA DE ACELERACIÓN PARA A INTERNACIONALIZACIÓN DE PEMES "GALICIA AVANZA" PARA AS CONVOCATORIAS 2024 E 2025**

**MEMORIA XUSTIFICATIVA**

A directora da Axencia Galega de Innovación da Consellería de Economía, Emprego e Industria, **DECLARA:**

Que a Axencia Galega de Innovación (en diante, Gain), o Instituto Galego de Promoción Económica (en diante, Igape) a sociedade Parque Tecnolóxico de Galicia S.A. (en diante, PTG, S.A.) ten previsto formalizar o instrumento convencional arriba referido por un período de vixencia que abrangue dende a sinatura do convenio ata o 31 de marzo de 2026.

Que o instrumento convencional ten por **obxecto:**

Determinar as bases da colaboración entre as entidades asinantes para desenvolver as convocatorias previstas para o 2024 e o 2025 do programa de aceleración para a internacionalización das pemes galegas, denominado GALICIA AVANZA. O obxectivo deste programa é impulsar a internacionalización das pemes innovadoras de calquera tipo de ámbito ou sector que necesiten unha panca para a validación, o posicionamento e o fortalecemento da súa competitividade en mercados exteriores, achegando así o tecido empresarial galego ao mercado global.



Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se **fundamenta** no seguinte:

1. Que o Parque Tecnolóxico de Galicia S.A. (en diante PTG, S.A.) é a entidade responsable de xestionar un conxunto de infraestruturas, espazos, recursos, capacidades e servizos destinados a empresas, emprendedores e proxectos que utilizan como ferramentas de crecemento a innovación e o coñecemento. Ademais PTG, S.A. mantén vínculos activos de colaboración con universidades, centros de investigación e empresas co obxectivo de fomentar as actividades de I+D+i e o desenvolvemento e a competitividade empresarial.
2. PTG, S.A. ten un percorrido de máis de 30 anos de experiencia impulsando actividades industriais avanzadas, a través da súa involucración en proxectos de incubación e aceleración de empresas, asesorando en materia de I+D+i e facilitando o acceso a financiamento de proxectos innovadores, todo iso en consonancia con estratexias rexionais como a RIS3.

A actuación pretendida co convenio ten os seus antecedentes na colaboración no ano 2015 entre PTG, S.A. e Gain para a posta en marcha do primeiro programa do Centro de Excelencia para o Impulso do Crecemento Sustentable da Peme Innovadora Galega, denominado Programa Agrobiotech Innovación. Debido ao óptimo





desenvolvemento deste, celebráronse dúas edicións máis nos anos 2017 e 2019. Esta colaboración reorientouse posteriormente, no ano 2020, como un novo programa de aceleración especializado na comercialización de solucións innovadoras para a loita contra o impacto da covid-19, denominado CONNECT-19, no que participaron 20 empresas.

O 31 de marzo de 2022, baseándose na experiencia adquirida nas tres edicións do Programa Agrobiotech Innovación e en CONNECT-19, Gain, Igape e PTG, S.A. suscribiron un convenio de colaboración para o desenvolvemento das súas primeiras edicións do programa de aceleración especializado na comercialización internacional da innovación, denominado GALICIA AVANZA. Deste programa, que comezou no 2022 e cuxa última convocatoria rematará no primeiro trimestre de 2024, resultaron beneficiarias 60 empresas, as cales foron seleccionadas na convocatoria de 2022 e de 2023. Estando a primeira totalmente rematada e a segunda en plena fase de execución dos itinerarios.

3. Que partindo do valor engadido que implica a experiencia previa adquirida coa que conta o PTG S.A. derivada da posta en marcha dos programas de aceleración anteriormente indicados, así como dos satisfactorios resultados obtidos das devanditas iniciativas, o PTG S.A. está interesado en continuar desenvolvendo o programa de aceleración especializado en internacionalización a través de dúas novas convocatorias, en 2024 e 2025.





4. Que o plan de actividades incluído no desenvolvemento das dúas novas convocatorias do programa de aceleración proposto polo PTG S.A. configúrase como axeitado para seguir contribuíndo a acadar o concreto interese da Xunta de Galicia neste eido e como medida idónea para complementar as actuacións que GAIN e IGAPE están implementando en relación co crecemento e internacionalización das pemes galegas innovadoras en desenvolvemento das competencias que lles corresponden nestas materias.
5. Que o programa de aceleración GALICIA AVANZA está perfectamente aliñado cos obxectivos da Estratexia de Especialización Intelixente, RIS3 (2021-2027). Este documento define claramente a folla de ruta das prioridades que Galicia debe coidar para crecer e renovarse, competir no exterior e ser máis eficiente a través da especialización en I+D+i, as cales son: evolucionar o modelo produtivo, gañar competitividade e crecer de forma sostible no tempo, xerar emprego de calidade e contribuír a dar resposta aos grandes retos e necesidades da sociedade. O programa GALICIA AVANZA ten o seu encaixe no Reto 2, modelo industrial baseado na competitividade e no coñecemento.
6. A Asociación de Parques Tecnolóxicos de España (APTE) recoñece o valor dos Parques como ecosistemas de innovación, promotores de iniciativas de transferencia de tecnoloxía grazas á convivencia de empresas, universidades e centros tecnolóxicos que os converten nunha contorna ideal para impulsar estratexias rexionais.





Estes ecosistemas non se ven reproducidos en ningún outro organismo do sistema nacional de innovación, polo seu carácter transversal non sectorial, no que se constrúen relacións efectivas entre empresas, universidades e centros de investigación que comparten a contorna, favorecendo a transferencia de coñecemento e tecnoloxías á industria e reforzando conexións con empresas tractoras. Neste sentido PTG, S.A. é o promotor adecuado para calquera iniciativa de aceleración empresarial na que a innovación sexa relevante.

PTG, S.A. é o único parque científico-tecnolóxico de Galicia, representando o espazo físico de encontro entre o sistema público de I+D+i e o tecido privado, ten experiencia demostrada no desenvolvemento de programas de aceleración para empresas e conta cos profesionais e colaboradores necesarios para levar a cabo as actuacións obxecto desde convenio.

7. Á vista da experiencia e do coñecemento de PTG, S.A. expostos, considérase que non hai outra entidade en Galicia que permita garantir o éxito de execución e de cumprimento de prazos que o obxecto do programa de aceleración GALICIA AVANZA esixe.
8. O importe total do convenio ascende a 2.227.945,46 €. GAIN e IGAPE compensarán ao Parque Tecnolóxico de Galicia S.A. polos custos xerados con posterioridade á data de sinatura do presente convenio cun importe máximo de 2.200.000,00 € segundo se detalla no convenio. Desta cifra, un importe máximo de 1.600.000,00 € farase efectivo con cargo á aplicación orzamentaria 09.A2.561A.640.0 do proxecto 2016-00004, que figurará no orzamento de gastos da





Axencia Galega de Innovación para o ano 2024 e seguintes; e un importe máximo de 600.000 € disporase con cargo á aplicación orzamentaria 09.A1.741A.640.0 do proxecto 2021-00014, que constará no orzamento de gastos do Instituto Galego de Promoción Económica para o ano 2024 e seguintes.

Orzamentos de Gain:

| Aplicación<br>orzamentaria | Código de<br>proxecto | Anualidade | Importe con IVE |
|----------------------------|-----------------------|------------|-----------------|
| 09.A2.561A.640.0           | 2016.00004            | 2024       | 150.000,00 €    |
| 09.A2.561A.640.0           | 2016.00004            | 2025       | 1.100.000,00 €  |
| 09.A2.561A.640.0           | 2016.00004            | 2026       | 350.000,00 €    |
| Total (Importe con IVE)    |                       |            | 1.600.000,00 €  |

Orzamentos do Igape:

| Aplicación<br>orzamentaria | Código de<br>proxecto | Anualidade | Importe con IVE |
|----------------------------|-----------------------|------------|-----------------|
| 09.A1.741A.640.0           | 2021.00014            | 2024       | 132.000,00 €    |
| 09.A1.741A.640.0           | 2021.00014            | 2025       | 336.000,00 €    |
| 09.A1.741A.640.0           | 2021.00014            | 2026       | 132.000,00 €    |
| Total (Importe con IVE)    |                       |            | 600.000,00 €    |

Por outra banda, o PTG, S.A. no marco deste convenio, aportará os medios persoais propios e materiais que resulten precisos (espazos e medios técnicos existentes nas súas instalacións) para participar na Comisión de Seguimento e no Comité Técnico, coordinar a execución do programa de aceleración, organizar as xornadas formativas previstas e realizar todas as labores propias de oficina técnica. PTG, S.A. asumirá uns custos indirectos por valor de 27.945,46 € que non son obxecto de compensación no convenio segundo se desagrega na memoria económica do convenio.





| Custos indirectos<br>PTG, S.A. | Ano 2024   | Ano 2025    | Ano 2026   |
|--------------------------------|------------|-------------|------------|
| 27.945,46 €                    | 8.033,22 € | 16.335,33 € | 3.576,91 € |

9. O convenio asinarase de acordo coa Orde do 11 de febreiro de 1998, pola que se regula a tramitación anticipada dos expedientes de gasto, modificada pola Orde do 27 de novembro de 2000 e pola Orde do 25 de outubro de 2001, que posibilita a tramitación anticipada dos expedientes de gasto, quedando condicionado á existencia de crédito adecuado e suficiente nos orzamentos da Comunidade Autónoma para o ano 2024.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a formalización dun contrato dos contemplados na Lei 9/2017, de 8 de novembro, de Contratos do Sector Público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria,

A directora da Axencia Galega de Innovación  
Patricia Argerey Vilar

*(Documento datado e asinado dixitalmente na marxe)*

